



*Jumat, 19 Juli 2024*  
**Ogen: Johanes 11:3-5**



**Keleng Kal Ate Jesus**



**P**ertemanen si luar biasa, la saja antara sekalak jelma tapi sada jabu. Bagenda me ituriken kerna Maria ras Marta turang Lasarus, duana ia ersenina rikut ras turangna si Lasarus ndeher kal i bas pertemanenna ras Jesus. I bas paksa jamanta si genduari enda banci ikataken kalak enda 'se sirkle; se frekuensi' i bas erti tep-tep Jesus ku Betani pasti keluarga enda me si ijumpana nta pe singgah ku rumahna. Keluarga (senina ras turangna) sada arihna guna ndukung pelayanen Jesus.

I bas renungenta teridah komunikasi si mehuli ras Jesus tetap ibangunna, la atena kesilahan berita kai pe isehkenna man Jesus. I ja paksa e si Lasarus sangana sakit, emaka kata 'temanNdu si ikelengiNdu sangana sakit' nuriken bage ndeherna ia ras, janah terkandung arapen maka lit min ilakoken Jesus kerna si Lasarus enda. Ituriken Jesus kai si jadi denggo maka arah kai si inanami Lasarus paksa e tujunna e me gelah terpuji Anak Dibata. Man bana duana ipetangkas Jesus kai si jadi, sebagai teman singlarapken turangna malem i bas pinakitna nari janah ipetetap Jesus ukurna ibas ngalaken pinakit enda. Penulis kitab Johanes enda nekanken maka teluna siersenina ras erturang enda keleng kal ate Jesus.

Banci sigejabken kuga bentuk, muaten ras penggejapen kerna kekelengen Jesus si banci sirenungken. Luar biasa Maria, Marta ras Lasarus seri ka atena kelengna man Jesus alu ngelai ras ndukungsa i bas pelayanen siilakokenna. Bagenda me si ersenina enda duana nuriken kai pe siigejabkenna man Jesus. Pengalamen geluh duana diberu siersenina enda banci min siumban, tutus i bas pelayanen dengen mbages kal keleng atena duana nandangi turangna. Keleng ate erturang sendalanan ras ketutusan i bas erkiniteken. Janah kalak sibage keleng kal ate Dibata.